

Evening Dogri (NSD) Bulletin 03-12-2024

आकाशवाणी

1 राज्यसभा नै तेल क्षेत्र दे नियमन ते विकास सरबन्धी संशोधन बिल-2024 गी अपनी मंजूरी देई दिती ऐ।

2 सरकार ते विरोधी पार्टिएं बश्कार 5एं दिनें थमां बनी दी तनोतनी मगरा अज्ज संसद दी दौनें सदनें दा कम्मकाज रमानदारी कन्ने शुरू होआ।

3 विदेश मंत्री डॉ. एस. जयशंकर होरें आखेआ जे चीन कन्ने सामान्य सरबन्धे लेई बन्ने पर शांति बड़ी मती जरूरी ऐ।

4 प्रधानमंत्री नरेंद्र मोदी होरें कामयाबी कन्ने लागू होने आहले त्रै नमें आपराधिक कनूनें गी मुखे दे नमित कीता ऐ।

5 राष्ट्रपति द्रौपदी मुर्मू होरें दिव्यांगजनें गी बाख्तयार बनाने सरबन्धी राष्ट्रीय पुरस्कार भेंट कीते। उनें आखेआ जे दिव्यांगे गी सहानुभूति दी नेई सहायता दी लोड़ ऐ।

<><><><><><>

RS Oil Bill

राज्यसभा नै तेल क्षेत्र दे नियमन ते विकास सरबन्धी संशोधित बिल गी अपनी मंजूरी देई दिती ऐ। एहदे राएं तेल क्षेत्र नियमन ते विकास कनून 1948 च तरमीम कीती गई ऐ। बैहसू दा परता दिंदे होई तेल पेट्रोल ते कुदरती गेस सरबन्धी मैहकमे दे मंत्री हरदीप सिंह पुरी होरें आखेआ जे इस बिल राएं स्थिरता

यकीनी बनोग, मूल ढांचे दा विकास होग, अपराधीकरण घट्ट होग ते समस्याएं दे नबेड़े च सखाल होग। उनें आखेआ जे इस बिल राएं राज्यें दे अधिकारें दा हनन नेई होग। मंत्री होरें आखेआ जे इस बिल कन्नै तेल ते गैस दे क्षेत्र च कम्म करने आहलें गी सखाल होग। कांग्रेस दे सांसद शक्ति सिंह गोयल होरें इस बिल उपर नाखुशी जाहर कीती जदकि बीजेपी दे सांसद चूनी लाल होरें बिल दा समर्थन कीता। टी.एम.सी दी डोला सेन, वाई.एस.आर.सी.पी दे चेरम वेकंटा सुब्बा रेड्ड, बीजेडी दे मानस रंजन संगाराज, सीपीआई दे पी.पी सुनीर, बीजेपी दे संजय सेठ ते एन.सी.पी.एस.पी दी फौजिया खान होरें बिल उप्पर बैहसू च हिस्सा लैता।

<><><><><><>

Parliament

सरकार ते विरोधी पार्टियें बश्कार 5एं दिनें तोड़ी बनी दी तनोतनी मगरा अज्ज संसद दी दौनें सदनें दा कम्मकाज रमानदारी कन्नै चलेआ। लोकसभा ते राज्यसभा च प्रश्नकाल ते शून्यकाल दौरान सार्वजनिक हितै आहले मुद्दें गी पुट्टेया गेआ। उयां, लोकसभा च विरोधी दलें उत्तर प्रदेश दे संभल जिले च होई दी हिंसा ते इक बड्डे कारोबारी ग्रुप उप्पर लग्गे दे गुज्ज देने दे आरोपें पर थोड़े चिर लेई वॉकआउट कीता। विरोधी पार्टिएं इनें मुद्दें गी पुट्टने दी कोश्ट कीती पर स्पीकर ओम बिरला होरें उनेंगी इजाजत नेई दिती। समाजवादी पार्टी, कांग्रेस, डी.एम.आई.सी ते होनें एहदे पर दंड रौली पाई रक्खी। शून्यकाल दौरान

समाजवादी पार्टी दे अखिलेश यादव होरें संभल हिंसा गी शड़यंत्र करार दिंदे होई एहदे च शामिल पुलस अफसरें ते प्रशासकें खिलाफ कारवाई दी मंग कीती।

<><><><><><>

LS -Jaishankar

विदेश मंत्री डॉ. एस जयशंकर होरें आखेआ जे भारत ते चीन बश्कार सरबंधें दे विकास लेई बन्ने उप्पर शांति ते स्थिरता गी बनाए रखना बड़ा मता जरूरी ऐ। उनें आखेआ जे दौनें मुख्य औंदे दिनें च बन्ने आहले इलाकें च फौज गी झिगड़ा करने ते असरदार प्रबंधन आहली गतिविधिएं बारै चर्चा करडन। चीन कन्ने भारत दे सरबंधें कन्ने अज्ज लोकसभा च बयान दिंदे होई विदेशी मंत्री होरें आखेआ जे पिछले किश समें थमां दौनें मुख्यें बश्कार राजनईक स्तरै पर होई गल्लबात करदी स्थिति च सुधार होआ ऐ। विदेश मंत्री होरें भारतीय फौज दी सराहना करदे होई आखेआ जे माल समेयान दी थोड़ ते कोविड-19 आहली स्थिति दे बावजूद भारत नै चीन दा तगड़ेयाई ते शानदार ढंग्गै नै परता दिता। जयशंकर होरें आखेआ जे भारत नै बन्ने आहले विवाद गी हल करने लेई चीन कन्ने केई बारी गल्लबात कीती ऐ ते भारत गल्लबात राएं गै चीन कन्ने बन्ने आहले मसले गी हल करना चाहंदा ऐ।

<><><><><><>

PM-Criminal Laws

प्रधानमंत्री नरेंद्र मोदी होरें अज्ज चंडीगढ़ च नमें फौरी कनूनें दे सफल अमलावरी गी राष्ट्र गी समर्पित कीता। इस मौके उप्पर केंद्री गृह मंत्री ते

सहकारिता मंत्री अमित शाह भी मौजूद हे। इस कार्यक्रम गी संबोधित करदे होई प्रधानमंत्री होरें आखेआ।

प्रधानमंत्री होरें आखेआ जे इनें नमें कनूनें कन्नै भारग गी उपनिवेशक विरासत थमां मुक्त कीता जाग। मोदी होरें पंजाब ते हरियाणा दे हाई कोर्ट दे वकीले ते चंडीगढ़ बार दे सदस्ये दा बी चंडीगढ़ च नमें फौरी कनूनें गी सफलतापूर्वक लागू करने लेई धन्नवाद ते बधाई दिती। प्रधानमंत्री होरें आखेआ। इस मौके पर बोलदे होई केंद्री मंत्री अमित शाह होरें आखेआ जे 3 बरें दे अंदर-अंदर एह 3 नमें आपराधिक कनून पूरे देसै च लागू कीते जाडन। इस थमां पैहले प्रधानमंत्री नरेंद्र मोदी ते गृह मंत्री अमित शाह होरें चंडीगढ़ च 3 नमें आपराधिक कनूनें बारै लाई गेदी इक प्रदर्शनी दा दौरा बी कीता।

<><><><><><>

LS-MSPCrops

केंद्री राई-बाई ते करसान कल्याण मंत्री शिवराज सिंह चौहान होरें आखेआ ऐ जे केंद्र नै घट्टोघट्ट समर्थन मुल्ल च लगभग त्रै गुणा बाददा कीता ऐ। अज्ज लोकसभा च इक जिमनी सोआल दा परता दिंदे होई चौहान होरें आखेआ जे एनडीए सरकार नै लागत पर 50 प्रतिशत मनाफा जोड़ियै घट्टोघट्ट समर्थन मुल्ल तैह कीता ऐ। उनें आखेआ जे यू.पी.ए सरकार दे दौरान चौले दा घट्टोघट्ट समर्थन मुल्ल 1 जहार 310 रपे फही क्विंटल हा जिसी बधाइयै 2 जहार 300 रपे करी दिता गेआ ऐ। जिसले कि जोवार दे डेढ जहार रपे क्विंटल आहले समर्थन मुल्ल गी बधाइयै 3 जहार 371 रपे क्विंटल करी दिता गेआ ऐ। इससै चाल्ली बाजरे दी कीमत गी 1 जहार 250 रपे क्विंटल कोला बधाइयै 2

ज्हार 625 रपे ते रागी डेढ ज्हार रपे कोला बधाइयै 4 ज्हार 269 रपे फही
क्विंटल करी दिती गई ऐ।

<><><><><><>

RS-Health Care

केंद्री सेहत मंत्री जगत प्रकाश नड्डा होरें आखेआ जे सरकार देसै च प्राथमिक
स्वास्थ्य सेवा सुविधा गी मजबूत करने आस्तै लगातार कम्म करा'रदी ऐ।
राज्यसभा च अज्ज इक सवाल दा परता दिंदे होई नड्डा होरें आखेआ जे भारत
च तकरीबन 1 लकख 73 ज्हार आयुष्मान आरोग्य मंदर स्थापित कीते गेदे न।
उनें आखेआ जे केंद्र सरकार 30 बरे दी बरेसू तगर दे लोके लेई डायबीटीज़
हायपरटेंशन ते कैंसर जनेही बमारिएं दा पता लाने लेई जांच कराने दी योजना
बना'रदी ऐ।

<><><><><><>

LS-Weavers

कपड़ा मंत्री गिरीराज सिंह होरें आखेआ ऐ जे राश्ट्री बुनकर आयोग बनाने दी
कोई योजना नेई ऐ कीजे सरकार बुनकरें दी भलाई बेहतरी लेई लगातार कम्म
करा'रदी ऐ। उनें दस्सेआ जे केंद्र बुनकरें गी बी माली मदाद उपलब्ध
करोआ 'रदा ऐ। अज्ज लोकसभा च इक सवाल दा परता दिंदे होई सिंह होरें
आखेआ जे देसै च 26 लकख शा मते बुनकर न जिंदे चा 72 फीसदी महिलां न।
उनें आखेआ जे सरकार बुनकरें लेई निक्के कलस्टर विकास कार्यक्रम हत्थखड्डी

विपणन सहायता, मेगा कलस्टर विकास कार्यक्रम जनेही कई योजनाएं गी लागू करा'रदी ऐ।

<><><><><><>

Tribute Rajinder Prasad

राष्ट्रपति द्रौपदी मुर्मू ते प्रधानमंत्री नरेंद्र मोदी होरें अज्ज देश दे पैहले राष्ट्रपति डॉ. राजेंद्र प्रसाद होरें गी उंदे जनम ध्याड़े उप्पर चेतता कीता ते उनेंगी श्रद्धांजलि अर्पित कीती। अपनी इक सोशल मीडिया पोस्ट च प्रधानमंत्री होरें आखेआ जे संविधानसभा दे चेयरमैन दे तौरा पर डॉ. राजेंद्र प्रसाद होरें भारतीय लोकतंत्र दी मजबूत नीह रक्खने च अमूल्य योगदान दिता। उनें आखेआ जे अज्ज जित्थे सारें देशवासी संविधान दे 75एं बरें दा जश्न मना करदे न, उत्थे डॉ. राजेंद्र प्रसाद हुंदा जीवन दे आदर्श उनेंगी होर प्रेरणा दिंदे न।

<><><><><><>

Prez. Award

राष्ट्रपति द्रौपदी मुर्मू होरें अज्ज नमीं दिल्ली च दिव्यांगं दे अंतरराष्ट्री दिवस 2024 यानि International Day of Persons With Disability-2024 दे मौके पर 33 अनुकरणीय व्यक्तियें ते संस्थाएं गी दिव्यांगं दे सशक्तिकरण लेई राष्ट्री पुरस्कार प्रदान कीते। इस कार्यक्रम गी संबोधित करदे होई राष्ट्रपति होरें आखेआ जे अज्जै दे पुरस्कार विजेताएं गी समाज दे सामने रोल माडल दे तौरा उप्पर पंछानेआ जा'रदा ऐ। उनें आखेआ जे उंदा अनुकरण करियै होर बी व्यक्ति ते संस्था दिव्यांग जनें दे सशक्तिकरण दी बक्खी अग्गे बधी सकदे न। उनें

आखेआ जे दिव्यांगजनं च उद्यमिता गी बढ़ावा देने, उंदे हुनर गी विकसित करने, उनेंगी रोजगार देने, उंदे उत्पादें दी खरीद च तरजीह देने कन्नै उंदी क्षमता च बाद्दा होग।

राष्ट्रपति द्रौपदी मुर्मू होरें आखेआ जे अज्जै दे पुरस्कार विजेता स्हाड़े लेई प्रेरणा दा स्रोत बी ऐन। उनें दिव्यांगजनं गी वैश्विक सुलभता उपलब्ध करोआने च सुगम्य भारत अभियान दी भूमिका पर लौऽ पाई ते आखेआ जे दिव्यांगजनं गी सहानुभूति दी सहायता दी लोड़ ऐ। उनें एह बी आखेआ जे इनेंगी हर चाल्ली कन्नै बाधामुक्त माहौल उपलब्ध करोआना समाज दी प्राथमिकता होनी लोड़चदी।

राष्ट्रपति होरें आखेआ जे इस बरे दे दिव्यांगजनं दे अंतरराष्ट्री दिवस मनाने लेई चुने गेदा विशे:- “Amplifying the leadership of person with disabilities for an inclusive and sustainable future” दिव्यांगजनं च नेतृत्व दी क्षमता गी बढ़ावा देग। राष्ट्रपति होरें आखेआ जे कुसै होर व्यक्ति आहला लेखा दिव्यांगजनं गी कम्म करने दा मौका देना उंदे च आत्मविश्वास ते सार्थक जीवन जीने दी इच्छा गी पैदा करदा ऐ। इस मौके उप्पर सामाजिक न्याय ते सशक्तिकरण मंत्री डॉ. वीरेंद्र कुमार होर बी मौजूद हे।

<><><><><><>

Yadav-CoP

केंद्री पर्यावरण मंत्री भूपेंद्र यादव होरें असदी अरब च रियाद थाहर जमीन दे मरुस्थलीकरण गी रोकने लेई लग्गे दे संयुक्त राष्ट्र दे सम्मेलन काँप-16 च

मरूस्थलीकरण दी रोकने ते जमीन दी म्यार गी झिगड़ी औने थमां बचाने प्रति भारत दे पक्के निश्चय बारै लौऽ पाई। उनें सौक्के गी रोकने लेई भारत आसेआ कीते गेदे उपाएं बारै दस्सेआ-दसाया। मंत्रीस्तरीय इजलास च अपने भाशण दौरान श्री यादव होरें 2030 तोड़ी 2 करोड़ 60 लक्ख हैक्टेयर जमीन गी परतियै हरा-बरा करने प्रति भारत दी प्रतिबद्धता गी दोहराया। भारत नै एह निश्चय कॉप-14 दौरान कीता हा। उनें आखेआ जे वादे मूजब भारत नै जमीन दे निरंतर प्रबंधन आहले केंद्र गी स्थापित कीता जेड़ा नमीं तकनीकें कन्ने जमीन गी वापस हरा बरा बनाने दे कम्म च लग्गे दा ऐ। उनें करसानें गी मिट्टी दी सेहत सरबन्धी सायल हेल्थ कार्ड जारी करने ते जैव खेती लेई प्रोत्साहन देने जनेई गेंइएं बारै बी दस्सेआ। इनें पैहलकदमिं कन्ने रोजगार, खाद्य सुरक्षा, साफ-सुथरा जलवायु ते ग्राएं पिंडें च प्रगति गी यकीनी बनाया गेआ ऐ। सम्मेलन सवां बक्खरे श्री यादव होरें केन्या ते साउदी अरब दे पर्यावरण मंत्रिं कन्ने दपक्खी गल्लबात कीती ते आपसी हितै आहले क्षेत्रें च साथ-सहयोग गी होर तगड़ा करने बारै गल्लबात कीती।

<><><><><><>

ISRO

अंतरिक्ष शोध सरबन्धी भारतीय संगठन इसरो कल्ल श्रीहरिकोट च तीश धवन अंतरिक्ष केंद्र एसवां संझा 4 बज्जियै 8एं मिंटें पर PSLV-L 59 राकेट यानि PROBA-3 मिशन शुरू करोग। PSLV-C 59 यूरोप दी अंतरिक्ष एजेंसी दे PROBA-3 उपग्रह उप्परलै गासै च छोड़ोग। इसरो दी कारोबारी इकाई न्यू स्पेस इंडिया लिमिटेड गी यूरोप दी अंतरिक्ष एजेंसी थमां एह आर्डर थोआ हा।

PROBA-3 उपग्रह गासै च पुज्जने मगरा 2 हिस्सें च तकसीम होई जाग। एह उपग्रह सूरज दी बाहरली परता, औदे आले-दोआले दे वातावरण, अंतरिक्ष च मौसम ते सौ आंधी बारै अध्ययन करोग।

<><><><><><>

Encounter

जम्मू-कश्मीर दे श्रीनगर दे बाहरले इलाके दाचीगाम दे जंगलै च सुरक्षाकर्मिं ते आतंकवादिं बशकार होए दे टाकरे च इक कमांडर मारेआ गेआ ऐ। पुलस दे प्रवक्ता होरें आखेआ जे मारे गेदे आतंकवादी दी पंछान जुनेद अहमद भअ्ट दे तौरा पर कीती गई ऐ जेड़ा लशकर-ए-तोयबा आतंकवादी धड़े दा ए कैटेगरी दा आतंकवादी हा। प्रवक्ता नै जानकारी दिती जे जुनेद अहमद गांदरबल जिले दी सोनमर्ग गगनगीर थाहर 20 अक्टूबर गी इक टनल दे निर्माण स्थल उप्पर कीते गेदे हमले च शामिल हा जेदे च 6 मजदूर ते इक डाक्टर मारे गे हे।

<><><><><><>